

**Angajoqqaarsiat atugaasa pitsanngorsaavigineqarnissaat aningaasatigullu paaqqinninnerminnut tigusartagaasa qaffaavigineqarnissaat, taamatuttaaq nerisaqarnermut-, atisarsiutissat-, kiisalu kaasarfimmiorisartakkanut aningaasartuutaasartut ullutsinnut naapertuuttunngorlugit naleqqussarneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
**(Inatsisartunit ilaasortamit Laura Tàunâjik-mit, Siumut saqqummiunneqartoq)**

### **Akissuteqaat**

(Isumaginninnermut, Ilaqutariinnermut, Naligiissitaanermut, Inatsisinillu Atuutsitsinnermut Naalakkersuisoq)

### **Aappassaaneerinnineq**

Angajoqqaarsiat atugaasa pitsanngorsaavigineqarnissaat aningaasatigullu paaqqinninnerminnut tigusartagaasa qaffaavigineqarnissaat, taamatuttaaq nerisaqarnermut-, atisarsiutissat-, kiisalu kaasarfimmiorisartakkanut aningaasartuutaasartut ullutsinnut naapertuuttunngorlugit naleqqussarneqarnissaannik siunnersuummut Ilaqutariinnermut Peqqissutsimullu Ataatsimiititaliap isumaliutissiissutaa Naalakkersuisut soqutigalugu atuarsimavaat, iluarisimaarlugulu ataatsimiititaliap tapersersormagu paaqqinninnermut akit najoqqutaralugit aqqivigineqarnissaat, taamaalilluni akissarsiaritinneqartartut naleqquttunngortinneqarniassammata.

Ajoraluartumik ulloq mannamut isumaginninnermi tapisaritinneqartartut, akissarsiaritineqartunut akigitinneqartartut il. il. akit najoqqutaralugit aqqivigineqartarnerat ileqqusimannigilaq. Tamatumunnga ilaapput utoqqalinersiat, siusinaarluni suliunnaarnersiutisiat, ineqarnermut tapisiat, meeqqanut tapiissutit kiisalu isumaginninnermut atatillugu tapiissutit allat, aqqiissusseqqinnissap naammassineqarnissaata tungaanut akit najoqqutaralugit aqqiivigineqarsinnaasimannigitsut.

Taamaattumik aqqiissusseqqinnermi ingerlanneqalereersumi siunissami isumaginninnikkut tapiissutaasartut tamarmik ingerlaavartumik akit najoqqutaralugit aqqiivigineqartarnissaannik ersarissumik siunertaqartoqarpoq. Maajip 24-iani Procenti aqqiissutissaq pillugu Inatsisartut inatsisaat akuersissutigineqarpoq, tamatumalu kingunerissavaa isumaginninnermi tapiissutaasartut tamarmik siunissami akit najoqqutaralugit procenti aqqiissutaatarsoq atorlugu aqqiivigineqartalissammata. Tassunga tunngasumik itisiliinnermut innersuussutigissavara inatsimmut siunnersuummut oqaasertaliunneqartut.

Naalakkersuisut isumaqatigaat piaartumik ilaqutariit paarsisartut atugarisaat pitsanngorsaavigineqarnissaat pisariaqartoq. Tassunga ilaapput paaqqinninnermut isutisiat, ilinniartitaaneq, ilinniaqqinneq, soorlu aamma avataanit tapersersorteqarnissaq, oqilisaavigineqarnissaq kiisalu ilitersorneqarneq (supervision).

Naalakkersuisut meeqqanut inuusuttunullu atugarliortunut iliuuseqartarnerit allanngortinneqassasut anguniarpaat, taamaalilluni ilaqutariit paarsisartut nuimanagerusumik inissinneqarlutik, kiisalu ulloq unnuarlu paaqqinnittarfinnut inissiisarneq sivikinnerulerlunilu katsorsaanermut tunnganerulersinneqarluni.

Ilaqutariit paarsisartut pingaarnertut iliuuseqarfiginiarnerini pingaaruteqarpoq ilaqutariinnut paarsisartunut inissiisarnermi pitsaassutsip annerpaaffimminiinnissaa. Ilaqutariit paarsisartut piumassuseqartuussapput, nukissaqartuussapput kiisalu paaqqinninnissamik tigusinissaminnut piginnaasaqassallutik aamma tamanna ilutigalugu suliaminnut, suliap annertussusaa kiisalu piginnaasat qaffasissusaat tunngavigalugu aningaasalersorneqartariaqarlutik. Pingaaruteqarpoq ilaqutariinnut paarsisartunut ilinniaqqinnissamik piginnaasanillu qaffasaanissamik kaammattuinnissaq kajumissaaajuarnissarlu.

Saniatigut meeqqat inuusuttullu atugarliortut assigiinnitsunik pisariaqartitsisarput assigiinnigitsunillu ilaqutariit paarsisartut piginnaasaannut piumasaqartitsisarlutik. Taamaattumik meeqqat eqqortut ilaqutariillu eqqortunut qinerneqartarnissaat pikkoriffigisariaqarparput. Ilaqutariit paarsisartut tamarmik meeqqanik piumasaqartitsinerpaanik paarsisuusinnaanngillat.

Apeqqutit ilaqutariinnut paarsisartunut paaqqinninnersiutisianut, ilinniarnermut, ilinniaqqinnermut- aamma ingerlaqqilluni ilinniaqqinnermut avataaniillu tapersorsorneqarnermut pisariaqartitat tamakkiisumik isiginiarneqartariaqarput. Taamaattumik Naalakkersuisut naammagisimaarinnillutik paasivaat, Ilaqutariinnermut Peqqissutsimullu ataatsimiititaliap tapersorsoraat ataatsimut isiginnittumik iliuusissatut pilersaarusiortoqassasooq, tassani suut tamamik pineqartumut tunngassuteqartut isiginiarneqassallutik. Iliuusissatut pilersaarusiaq sivisuumik atasinnaasumik aqqissuteqarnissatsinnik qulakkeerinnittoq.

Naalakkersuisut isumaqatigaat paaqqinninnersiutisiaat 2017-imi akit najoqqutaralugit qaffanneqartariaqarnerimut pisariaqartitsisoqarmat, kisiannili aamma isumaqarlutik paaqqinninnersiutisiaat qaffaqqinneqarnissaannut iliuusissatut pilersaarutit suliarineranut atatillugu misissuilluartoqaqqaartariaqartoq. Qularisassaannigitsumik paaqqinninnersiutit assigiinnigiiartinneqarnissaat pisariaqartinneqassasooq, apeqqutaalluni paaqqinninnerup qanoq ittuunera qanorlu annertutiginera. Paaqqinninnerit ataasiakkaat piumasaqartitsisorujuussapput, ilaalli piuminarnerussallutik. Suliat ataasiakkaat tamarmik immikkut nalilersorneqassapput.

Tamatuma saniatigut eqqaassallugu pingaaruteqarpoq, paaqqinninnersiutisiaat ataatsimoortumik tapit tunngavigalugit kommuninit akilerneqartarmata. Ataatsimoortumik tapit ukiumoortumik akit akissarsiallu najoqqutaralugit aqqiissuteqarfigineqartarmata, kommunit toqqaannanngikkaluamik paaqqinninnersiutinut naleqqussaanermut taartisitinneqartarput, taamaattorli paaqqinninnermusiaritinneqartartut 2008-ip kingorna qaffaavigineqarnissaat soqutigineqarsimangilaq.

Naalakkersuisut ataatsimiititaliap pitsannguutissatut siunnersuutaat paasivaat, taakkulu aningaasanut inatsisissap isumaqatigiinniutigineqarnerani ilaatinneqarnissaat innersuussutigalugu.

Naalackersuisut taamatut oqaaseqarlutik siunnersuut akuersissutigineqassasoq  
innersuussutigaat.